

se ha hauto lettere da l'orator Contarini apresso monsignor de San Polo, che avisa detto monsignor *cum* tutte le zente sarà Luni a dì 10 sopra Po apresso Cremona, esso Illustrissimo Capitanio ha deliberato andar verso li per atrovarsi insieme a parlamento. Et lui proveditor Moro Luni se partirà de qui con le zente, per andar *etiam cum* artellarie a veder cussi a lo improvviso de far qualche fazione.

*Del Capitanio Zeneral preditto, da Brexa, di 8, a domino Baldo Antonio Falcutiq suo orator, qual è amalato.* Come havia hauto lettere di heri de monsignor de San Polo et de missier Galeazo Visconte da la Stradella; avisa el suo zonzor li quella mattina. Hozì saranno a San Joanin o Sermene et poi dimane a la boca de Trebbia, et poi Luni a dì 10 verso Caorso, et Marti sora Po; et li exorta a venir per terminar quanto se habbi a far. Et cussi Soa Excellentia havendo chiamato li capitani *ut supra*, li hanno promesso far ogni cosa loro; ma de le zente faranno el possibile, perchè a tal li resta esser pagati et è zorni 60 et 70 non hanno hauto danari. *Unde* Soa Excellentia ha terminato doman partirse per andar ad abocarsi sora Po con ditto monsignor de San Polo, et ha lassato ordine che l'proveditor Moro ensa et fazi massa di le zente fino al suo ritorno, che sarà a dì 12; et vol far una fazione etc.

Da poi disnar fo Collegio di Savii, et se intese esser morto questa matina a hore 13 da morte de fluo over tositato el reverendo domino Zuan Francesco Bragadin episcopo di Are, qual ha assà danari per fama; *unde* inteso questo, el Serenissimo, chiamato li Cai di X, mandono Bortolomio Comin segretario del Consejo di X con uno capitano li, et trovano sier Zuan Baptista da Pexaro qu. sier Alvisè con messo di sier Piero Morexini è in Cao di Istria podestà et capitano per danari, qual è fio de una sua sorella, et li vien el tutto; et li mostrò da ducati 1500 et arzenti per ducati 500, dicendo havia uno altro serigno con assà danari nel monasterio de Santa Caterina, raccomandado a una monacha da chà Bembo da San Zulian; *unde* fo terminato sier Nicolò Venier Cao di X andasse la matina al ditto monasterio. Fu et non trovò nulla.

*Da Brexa, di sier Zuan Ferro capitano et vice podestà, di 8.* Hozì se ha hauto lettere de monsignor de San Polo; scrive doman sarà sul piacentin. Et il conte Lodovico da Tiene ritorna a Soa Excellentia questa sera per confirmar l'ordine, et Luni si sarà a disnar el Capitanio Zeneral con ditto San Polo a disnar a Monteselli, et se abo-

cheranno insieme, et poi cadaun torneranno a le zente sue per ordinar de coniongersi con li exerciti dove parerà più a proposito. In questo mezo, el proveditor Moro redurà le nostre zente insieme. Hozì siamo stati con el signor duca de Urbino et il forzo de questi capetani alozati su questo territorio, per far contentano a far la massa dove li sarà ordinato; ai qual esso signor Capitanio li exortò molto; i qual risposeno loro eseguiranno, ma tutti hanno compito le loro page, sichè se non si manda danari da pagarli vedo nasser qualche gran disordine. Abbiamo de qui hauto la promessa de ducati 10 milia, oltra ducati 2000 che habiamo trovato nui ad imprestado; el resto speremo haver fra 10 over 12 zorni; ma el bisogno è che la Signoria mandi presto danari, acciò redutti che i siano se possi pagarli. Se ha hozì lettere dal signor Cesare Fregoso da Martinengo, come per una sua spia l'era avisato Antonio da Leva dovea passar Adda con le sue zente *excepto* 2000 lanzinech che l'lassava a Biagrassa; ma el signor Capitanio Zeneral non lo crede. Li 6000 sguizari che doveano venir a monsignor de San Polo se sono resolti che non vengino, et li lanzinech sono in esser 4500 et non più; et li venturieri sono in fama 7000, ma non se po tenir che non saranno se non 6000. Questa è tutta la fantaria sarà con monsignor de San Polo.

*Da Fiorenza, del Surian, fo lettere, di 5*

*A dì 11.* La matina, se parti domino Livio Grotto nontio di monsignor de San Polo, et ritorna al suo signor.

Vene l'orator de Milan iusta el solito.

*Di Vincenzo Fedel segretario fo lettere, da Surento, di 29.* Come il procurator Pexaro stava mal; era confessà et comunicato, et fato el suo testamento; *etiam* suo nepote sier Piero da Molin qu. sier Marin, et . . . Trivixan, et Inzegner Inzegner secretarii et quasi tutti de la soa fameia. *Item*, di le cose de Napoli malissimo; el campo retrato, et in Napoli ussiva et andava chi voleva; et altre particolarità.

*Di sier Piero Lando capitano zeneral da mar, da Vicho, a dì 29 et 31 Luio*

*Da Brexa, di sier Zuan Ferro capitano et vice podestà, di 9, vidi lettere.* Come l'ordine dedito di esser a parlamento el Capitanio Zeneral con monsignor de San Polo non sarà se non *post*